

萬歷仙居縣志卷之十

名宦列傳

晉羊忻永和三年初置樂安公以廕補令移縣治於青圭前有創始之勞史稱公起家輔國參軍嘗詣領軍劉琨琨拂席改衣而後見由此知名然莫詳其治樂安狀也

宋陳襄字述古閩之侯官人政尚德化去鞭箠之威與民休息事無冤抑者初邑人未興于文公闢黌宮勸社學仍爲勸學文歲首父老入賀命門人管師宣讀之自是弦誦相聞而人才蔚矣擢侍御史薦司馬光呂公著等三十人于朝並極一時之選力詆王安石乞罷青苗法竟爲所擠出知陳州終樞密直學士學者稱爲古靈先生

劉光 人政務簡惠黎民懷之後選台州守郡人喜其來焚香載道墨吏多聞風解印去及代男女巷哭閉城使不得去

萬歷仙居縣志

卷十

郭三益 人爲政寬和又能以嚴佐之民畏且愛與劉光齊名陳公襄後稱賢令者必曰劉郭

趙善悲字民如子歲侵賑給親自料理無問窮鄉僻壤撫循不倦民至今尸祝之

章敏子天性精敏瀕別夙弊吏不敢欺後令夏嘉治倣敏子凡不便民者釐革殆盡並著聲績稱爲章夏徐默成博綜墳籍約已恤民爲尉募年值呂師囊亂忠義奮激與巡檢鄒進力戰死之

崔縱爲丞未幾進承務郎金人以二帝北去前後通問者率爲所斃衆皆憚行公毅然請往不屈死之

國朝曹廷桂直隸武進人性廉潔不苟爲令七年案無留牘有便民者朝計而暮行之綽有成績國初循吏推公爲首

馬濂直隸無錫人曉暢吏事悉下情民依之如慈母嘗存靖難死節鄭公恕之

後而復其產嘉靖壬子倭寇焚黃巖將犯仙居公率兵邀擊之賊越嶺而遁尤著清節去之日父老歌曰民送兩行淚官行一擔書

余城江西鄱陽人嘗寇燹後城市蕭條人民逃竄公撫字有方流逋四集民復安堵爲人廉倨不肯媚要津務絕豪右之干請竟中萋菲以去于時張元卿者以簿攝行縣事其治倣余公其節尤苦綽有循聲

周裔登廣東南海人平易近民蒲鞭不施釜餽常有塵處民歌之曰官之清民之福昌其後崇其祿先是趙善政爲令禮士愛民頌聲日起未久改令東陽公代之治聲益著

湯聘尹直隸長州人前左給事中歷左參議以註誤出爲仙居令爲治務節冗費并里甲濬水利改舖舍有利於民者圖之惟恐不及後入覲主簿吳正大攝行縣事一遵公約束民稱便焉其并課清丁二事尤爲時論所褒

王明齋閩侯官人與古靈先生同鄉蒞政之日慨然懷往每事追踪先生而時

有主簿曾學周殫心輔令公修學宮曾入山採木戴星還公營平政橋曾出橐金助役經理不倦令與簿相得有成號稱一時之

王叔英字原采黃巖人爲訓導以忠孝節義勗諸士多所成立歷官翰林修撰靖難師迫公奉詔募兵聞金川門不守遂自經于廣德州詳見吾學編及赤城新舊志

吳泰閩延平人爲學諭豈弟作人尤加恩矜士歲時俟其至輒手俸金以授之曰若苦桂玉聊以資旦暮受者感泣陳學禮亦閩人勤訓誨躬行不怠士心向之其去也止石以志思焉

周思稷麻城人令臨海兩臺檄公于仙居履畝并圖公嚴明精審汰消耗董詭冒減圖一十有五積弊爲之一洗奸猾束手孱民沐其恩歌呼載道又推官俞霑通判鄒通皆以掌縣著績民咸思之

論曰徐默成殲身寇難崔縱隕身虜庭何遭時之坎與余城雖褫有餘榮矣

其餘談笑剗剗號稱良有司乃考其持節並有懸魚瘞鹿之風蓋身者政之本也意微自潤事輒頽然解矣景行行止是在後賢
名賢列傳

宋蔣旦字澹然政和五年與應灌同第進士先是邑之文學未振自旦與灌以力學顯士始慕而效之歷通判越州承議郎監石灰場懋著清節灌字仲宣終衡州教授子姓科第蟬聯世濟其美

吳芾字明可紹興二年進士官終龍圖閣直學士高宗欲還臨安公請駐蹕建康詔告中外使知不忘中原之意疏入不報朱子謂當紹興之季天子憤金虜之憑陵痛神人之羞辱慨然收用耆俊以遂中興之烈其所引拔以爲諫諍議論之臣者多得直諫敢言之士而吳公又其偉然有聞于時者也史稱王十朋吳芾歷詆奸幸直言無隱惜其不盡用焉

張次賢字子齊紹熙四年進士歷監察御史右正言兼侍講多所啓沃常揭古
萬歷仙居縣志 卷十 二 仙居叢書
今治亂之由實以國家修短之驗爲書二十卷名曰監察錄又陳恢復之策動中機宜中外傳爲碩書尋遷左司諫抗節直言不避權幸劾時相史彌遠章九上彌遠銜之極力排劾公不爲動嘉定中擢殿中侍御史將大用之公力辭無何疾作卒諡文康公博學多聞千言立就而天性孝友居官廉潔妻謝氏丞相深甫之女于皇太后爲姑故累朝眷注甚厚公心澹然尤爲時所欽慕

郭磊卿字子奇嘉定七年進士居諫職彈劾無所畏避理宗懷余天錫定策之恩擢至執政公上疏曰臣聞鷓鴣入林鳳凰遠去豺狼當道鸞麟自藏不仁而在高位則抱道懷德之士莫之敢近矣陛下欲聚羣賢以興邦治而股肱喉舌之任乃使庸邪廁迹其間是却行而求前也章三上天錫竟罷去史嵩之怙權不法公具疏俟朝對奏之而爲嵩之耳目所得亟除公起居郎公憤不得言徑出國門求去遂悒悒而卒時公與侍從徐元杰等號端平六君子天下方想望其風采而相繼以歿上亦念之特諡正肅立正諫坊以旌之

陳庸字時中紹興間進士終江西提點刑獄每辭官歸惟圖書數卷其子章歷官光祿大夫清介能繼父志爲時所稱卒諡忠簡

鄭雄飛字景淵端平間進士累官秘書少監戶部侍郎清譽著聞景定中太學生金渭等請祀公及縣尉吳諒于學宮稱六賢堂

國朝王一寧字年十三能詩文隨父峻用官京師獻陵在東宮聞而召之試詩稱旨賜以金綺遣肄國學第永樂十六年進士授工部主事蒞事湘湖以廉介自持景陵求文學詞翰之士有司以公名聞召見命賦神京八景及嘉禾詩善之尋轉吏部主事以母老疏乞歸養不允改翰林修撰侍經筵正統改元兼修宣廟實錄擢禮部右侍郎督餉湖廣時苗蠻蠢動運道不通公擘畫有方民不勞而餉足回部轉左侍郎兼翰林院學士入內閣加太子少師公歷事四朝賞賜優渥主會試一主鄉試二詩文秀雅襟度坦夷獎成後進惟恐不及休休焉有古大臣之風卒贈太子太保禮部尙書諡文通

萬歷仙居縣志

卷十

四

仙居叢書

張成德字成化六年貢爲南充知縣南充人好訟往往骨肉相殘公創諭俗亭作戒三篇月令父老申諭第其善敗而勸懲之風俗爲之一變又創五經書院延名士爲弟子師捐俸以資其費春秋久無傳習公親爲講解士皆悅服稱爲張夫子尋應聘爲雲南考官時山賊猖獗他邑禦之輒北公設奇應變遂蕩平之量移通判饒州百姓如失父母遮道泣送者萬計至今尸而祝之公遂謝病歸家居十年所著有史略箴言遜志存稿

王純字宏文成化十七年進士起家工部主事時太子少保工部尙書王恕忠亮端方朝廷倚以爲重直諫忤旨內批令致仕公言恕社稷臣宜留用以光聖德上怒下公詔獄謫思南推官尋起爲湖廣提學僉事公謹矩度先行誼抑浮競士類翕然嚮風未竟其用而卒衆咸惜之

應良字元忠正德三年擢南宮逆瑾方張威鉗文士公憤恚而歸聞王文成倡良知之學亟往從焉六年殿試二甲第七人改庶吉士授編修時逆瑾雖誅羣

奄用事公恥于脂韋竟乞終養肅皇嗣統起公田間議大禮忤旨杖闕下幾死尋奉使冊封唐王悉却贖餽已出爲山東提學副使歷陞廣東布政使致仕卒所著有南洲集藏于家

吳廉字 正德九年進士授禮科給事中時郭武定張壽寧以勳戚貴幸衆爭阿附公獨疏其罪惡武皇欲幸西北公偕同官上疏懇留跪午門外三日巡撫王某怙權恣肆公論斥之力薦王守仁堪代其任中貴畢眞鎮守江西受寧庶人金薦其孝行于朝公引祖訓駁之事遂寢大駕還京公請郊天策士以追帝王之盛節轉戶科右給事中世廟嗣統首陳四事曰正君德開言路時經筵近儒臣上嘉納之自是直聲振朝廷柄國者忌之出爲四川參議公至輒糾重臣之使蜀殃民者民賴以安然衆皆憚而嫉之矣公不能媮阿瓦合乃三疏乞休簪冠芟服徜徉於雲蘿烟水之間翛然適也有許遊擊者以事餽公千金公正色却之又獨請於當路建雙忠祠以祀盧鄭二公其剛正類如此

應大猷字邦升正德九年進士授南京刑部主事公智識絕人宸濠之變廷議紛紛公獨策其必敗曰是何能爲不三日濠擒而捷書至矣已而果然衆皆歎服轉吏部主事尋出參政江西晉廉使布政使公清慎自飭內恕外嚴吏畏民懷聲望日重擢副都御史巡撫雲南地當交趾之衝夷情叵測公明法制時教閱繕器械選將士凡塞堡要害無不嚴爲之防諸夷懾服民賴以安轉吏部侍郎進刑部尙書並著聲績爲時名卿嘉靖 年致仕公歷官五十餘年其端方之度廉潔之操仁恕之心始終如一士有片言急于游揚家無餘資樂于施賑人皆德之朝廷賜存問者三卒年九十有七弟大桂子存性存卓孫汝化朝卿皆登進士大桂存性爲良二千石存卓以九列辭榮望高朝野汝化朝卿方駿駸大用其鄉薦及貢歷曹郎守令者又數人冠裳濟美甲于一郡

張儉字

正德九年進士除工部主事尋改南刑部稍遷員外郎大禮議起

公抗疏被杖垂死出爲江西僉事豐城水溢公親行視築堰以殺其患民歌之

名爲張公堰調福建僉事陞四川副使銅梁盜賊騷動公悉計剪除一境肅然陞福建參政未幾罷歸所著有圭山近稿

蔣泮字

天性廉潔力學安貧父祿令安溪甌塵釜魚嶮然不滓卒於官當

路賻贈二百餘金泮恐傷父志悉辭不受巡撫錢公鉞賢之檄所過州縣皆爲設祭以表揚之第正德十五年進士授工部主事權稅荊州痛懲奸吏百弊漸剔嚴立條款悉蠲常例立石以垂永久江陵驛日具支應銀二錢七分公行州貯庫以備賑荒光澤王重公雅操及公回部贈之詩云清風千古人難並白日歸鴻數卷書陞員外郎督理倉廩中貴楊某欲交驩公公弗與款狎楊憾之思欲中傷已而察公所爲益加敬憚言于侍郎董公曰數年以來未有廉能如蔣副郎者稍遷郎中再使湖廣卒於蘇州囊橐罄懸無以爲殮知府胡纘宗倡僚屬經紀其喪

李一瀚字源甫嘉靖十七年進士初令安福創審編之法釐革宿弊下不能欺

擢御史巡按江西食不重味一意便民而風裁肅然貪墨斂迹累遷副都御史屬纘之時囊無長物司空朱公衡稱公廉潔之操一塵不滓有趙清獻之風後二十年左都御史吳公時來遺書郡守楊公道會曰李都憲天下第一流人物迄今未與鄉賢子孫貧也楊亟爲申請祀于學宮

吳時來字

嘉靖三十二年進士起家松江府推官值倭寇猖獗華亭上海

之民奔就郡城守者閉不納公坐城上洞開諸門聽民奔入甫盡而寇至矣全活萬計擢禮科給事中奉使册封琉球時嚴分宜竊政其子世蕃贖貨無厭將臣解體南北騷然公疏請黜嵩以正國體誅世蕃以杜亂源永陵震怒謫戍廣西昭陵卽位以遺詔復官歷陞都給事中操江副都御史吏部右侍郎都察院左都御史卒贈太子少保

盧明章字

嘉靖四十四年進士授行人擢監察御史巡鹽長蘆負稅被繫

者久或瘐死獄中公奏蠲其十之八又陳利弊六事商民德之改按巡天剖決

冤滯覆盆者有二天焉尋復命會鄉人金崇厚者辦事於京以邑丁消耗欲請并圖於上公力主其議竟得請邑又困於鹽牙往往蕩產以償公遺書當路歸其牙於商民困始蘇未幾疾作而卒

余世英字明卿嘉靖十五年選貢入南雍丁酉中應天王諷榜任山東堂邑知縣清介自持愛民猶子堂饑公捐振濟活以萬計堂民謠曰余父慈來何遲蚤來省百姓饑既而陞松江通判民又謠曰余父慈去何之一度思量一度悲公生而穎異七歲能書大字爲刺史重長兄諱世忠亦以選貢任宿遷教諭一時政教齊魯公父母偕老九旬欲迎養未得居松晨夕思慕僅八月而疾作未竟其用衆共惜之

論曰天下皆鄉也匯鄉而成天下問其鄉之靈氣必以其人考之而天下之大觀備矣僂無殊絕奇麗之產聞於天下而考論人文其大者多策奇樹偉磊落不可窺較而次者清修絕俗矚然不滓於時自宋迄今若比肩而立蓋

天下之士非獨一鄉之善而已也吾是以著其傳俾作史者有考焉